

In Memoriam Voorzitter Jossy Tromp

Mi no tabata conoce sr. Jossy Tromp te ora cu el a bira voorzitter di Raad van Advies. Como Aruba a haya e status di Pais na 1986 esey tabata rekeri cu lo tin un Raad van Advies, un Consejo Consultativo tambe, manera e ta hancra de nos constitucion. Nos, e prome miembronan di e Consejo aki, e Secretario y e Secretario suplente a reuni pa prome biaha na un oficina situa na e di dos piso di e edificio di postkantoor na Playa. E prome reunion a trata puntonan di trabou di Raad van Advies. Kico tabata ser spera di nos? En todo caso no manera Raad van Advies di Antiya Neerlandes tabata traha, es decir yega na un conclusion despues di a lesa e concepto di ley, si ta pone e stempel di "geen bezwaar" of "enkele bedenkingen/bezwaren". Como ami a core stage na Raad van State na Hulanda y a traha un verslag extenso cu varios muestra di advies y nan slotconclusie, e verslag ey a sirbi como e prome guia den nos trabou. Despues nos tabata reuni den e edificio di e dépendence di UNA y despues di esey Raad a haya un oficina nobo na e Layex Building. E tempo ey Raad van Advies tabata tambe instancia di apelacion den casonan ex art.18 LTU. E trabou tabata hopi pero interesante y e miembronan tabata aporta di nan conocimiento pa yega na un consejo optimal. Prome voorzitter di Raad van Advies a bira sr. Jossy Tromp y e prome miembronan tabata Shon Fedi Eman, Shon Marugg, sr. Frans Figaroa, y mr. Joe Maduro. Mi ta usa e nombernan di cariño pa expresa e cariño y alabes respet pa e personanan aki di cua ya cuater a bay laga nos. E prome Secretaris tabata mr. Neppy Henriquez y ami tabata Secretario suplente. E ambiente di trabou tabata excelente y voorzitter Tromp tabata bisa na final di un reunion: "E reunion aki a bay hopi bon. Nos a hari hopi". Voorzitter Tromp tabata gusta hari. Semper e tabatin un sonrisa riba su cara. Casi tur dia e tabata bin oficina y nos a dune e nomber di cariño 'Papa Tromp'. E tabata conbersa cu nos y si e keda mucho su señora Toos tabata yama pa puntra si ainda e tabat'ey. Nos tabata bis'e: "Ja hoor, we zorgen goed voor hem". Voorzitter Tromp tabata lesa un begroting manera un novela. Su conocimiento riba e tereno aki tabata enorme, pasobra e a yega di ta director di Departamento di Fi-

nanzas, Diputado di Finanzas, Minister di Finanzas y Gezaghebber. Ta con bo por a gañe riba e tereno aki! El a siña mi con pa analisa un presupuesto y e tabata bisa mi cu e ta confia cu mi ta busca tur cos riba ley cu tabata ser presenta. Admirabel tambe tabata e respet pa otro entre e miembronan di e Raad y e personal y nunca tabata papia riba origen di partido politico. Na su despedida di e mundo aki, mi ta desea di yama voorzitter Tromp hopi



danki pa tur loke el a siña mi. Hopi danki tambe pa tur loke el a haci pa Raad van Advies y pa Aruba. Es ta un bunita bida di sirbishi pa su pais Aruba. Na su famia mi ta desea

hopi forza den e dianan aki. Nunca lo mi lubida bo, voorzitter. Tabata un honor pa mi di a conoce bo y di a traha banda di bo como Secretaris. Papa Tromp, sosega na paz

den Reino di bo Creador.

mr. Alida (Lily) Rasmijn-Marval
Oud Secretaris Raad van Advies